

中華郵政總局特准掛號認爲新聞紙類
中華民國十三年九月十六日出版

京北公報

第二百七十二期

星期二

京兆公報第二百七十二期目錄

命 令

大 總 統 令

地 方 法 規

京兆河防災振事務處辦事大綱

本公署公牘

京兆各縣被災通電

批張承德呈一件

批史鶴鳴等呈一件

批毛永年等呈一件

批王福田呈一件

批石崑等呈一件

批張慶椿呈一件

批薛寶珍等呈一件

批沈桂芳呈一件

批王心田等呈一件

京兆各縣水災調查報告節略

勸募諸大善士捐給各災民舊衣服以禦寒冷文

京兆印花稅處公牘

訓令二十縣知事本處撥解京兆國儲局經費一案由京兆各縣徵收印花稅款項下按月分半數攤解令仰遵照辦理文

命令

大總統令 九月七日

據蘇皖贛巡閱使齊燮元四日電呈浙省叛督盧永祥反抗中央招集亂黨蘇省尤處密邇爲保境安民計不得不設防自衛乃該叛督糾同何豐林擅發逆衆攻擊蘇防竟於三日通電背叛中央四日拂曉在江蘇崑山縣附近地方同時並發先施攻擊希圖掩襲不備肆其凶殘蘇省防衛疆土素守和平自應悉力扞禦以期達保安之宗旨又據該巡閱使電稱該叛督等罪大惡極國法不容仰懇獨斷立頒明令討伐以尊法紀等語復據直魯豫巡閱使吳佩孚副使王承斌兩湖巡閱使蕭耀南熱察綏巡閱使王懷慶陸軍檢閱使馮玉祥等先後電請並同前情慨念頽歲四方多故百業凋殘加以今年天災流行嗷鴻遍野本大總統視事以來耿耿之懷惟冀創痛餘生從茲休養雖各省間有隔閡亦但期感以誠信漸致協和該叛督等逆跡漸彰迭據陳報猶飭前方將領恪守防地毋得輕召釁端曲示包容冀其悔悟不意其公然首先破壞治安違背全國人民愛護和平宗旨本大總統爲戡暴安民起見實萬難聽其譎幻徒苦吾民盧永祥何豐林均著褫奪官勳並免去本兼各職由齊燮元督率部隊相機剿辦江浙兩省素爲文化之藪富庶之區人民心理無不酷愛和平嗚望統一脅於暴力無可控訴枉遭災黎亦用痛心所有被逆徒裹脅地方應責成各路將領迅速恢復以期早日收束軍事俾安民業中外人民生命財產並宜一體認真保護毋任絲毫驚擾至浙滬兵隊本無畛域胥屬脅從其有自拔來歸悉予自新之路去逆效順除暴安良綏定之期指日可待布告諸方咸喻此意此令

大總統令 九月五日

命令

一

楊長義王翰章岳曙雲任居建均晉授陸軍中將延年加陸軍中將銜胡玉振晉授陸軍少將柳長清劉鈺杜錫鑑朱裕林授為陸軍步兵上校金吾王春華授為陸軍礮兵上校薛子銘授為陸軍一等軍醫正此令

大總統令 九月九日

李濟臣加陸軍上將銜岳維峻馬燦林張廣瑞曹世英楊承杰周錚孟廣隆白登李瑤阿劉煥森均晉授陸軍中將吳文鎧金尊華均加陸軍中將銜丁炳芹譚家駿張樹霖王汝楷楊朝輔徐壽椿陳文釗王喬閻日仁周炳昌張志遠楊茂亭岳官平安錫嘏鄧寶珊李雲龍李紀才萬金聲彭玉達馬文德李鴻鸞王石清田聯會均晉授陸軍少將蔣世傑加陸軍少將銜蕭玉清晉授陸軍礮兵上校並加少將銜王祥生陳又新鄒國楨蔭憲章杜慶傑均晉授陸軍步兵上校楊鳳五晉授陸軍軍法總監劉紹曾晉授陸軍軍需總監劉國慶晉授陸軍軍醫總監閻瑞清晉授陸軍軍需監劉子波晉授陸軍軍醫監此令
胡景翼加陸軍上將銜此令

＊ 地 方 法 規 ＊

京兆河防災振事務處辦事大綱

一本處定名為京兆河防災振事務處

二本處專辦河防籌振各事宜

三本處設於本公署

四本處設督辦一員由京兆尹兼任以下設坐辦幫辦顧問處員若干人

五本處事務分爲文牘庶務調查籌備各科

六所有處內事務由坐辦稟承 督辦指派辦理第五條各項事務各幫辦輔助辦理一切

七處員應輪流值班值夜以免誤公

八本處員司除調查得隨時由外調派外其餘概由本公署人員兼任不另支薪

九本處應用員司不論廳科得由坐辦幫辦隨時指名調處指派事務

十本處以河防災振事務完全事竣爲止

* 本公署公牘 *

京兆各縣被災通電

(銜略)京兆地面於夏至節後陰雨連綿十有數日永定河驟因漫溢決口其他各河亦復因山洪暴發水勢徒漲以致宛平涿縣固安良鄉三河香河寶坻各縣均遭災厄田地淹沒收成無望房屋坍塌畜產漂流蕩析離居災情奇重綜所損失數難核計 庚親往災區勘查人民扶傷救死慘不忍言已於本署成立京兆河防災振事務處趕放急賑勉集流亡惟災區既廣難民孔多庫帑久空艱於救濟除呈明大總統國務院外特此電達諸公痾瘝在抱胞與爲懷久着慈善之宏規敢期任恤之後遺務懇閱此災黎慨施仁粟廣爲勸募匯寄來京以資拯卹夢庚謹代各縣災民九頓首以請

北京參衆兩院各部總次長各督辦檢閱使京畿衛戍總司令步軍統領警察總監各省區巡閱使巡閱副使督軍督理督辦幫辦總司令省長都統護軍使各師旅長各省區議會京內外各商會各慈善團體各報館均

鑒

京兆尹劉夢庚叩號

批張承德呈劉子清侵佔地點妨害營業請查辦文 九月一日

據呈劉子清侵佔該民賣貨地點請賜委查等情到署該民所營係何業務劉子清所接羅開耀者又係何缺來呈均未明白聲叙碍難核辦且所請維持原案一節本公署無案可稽尤難懸揣而斷惟該地點既在阜城門外月壇市場是否應歸營汎管轄仰再詳細聲復以憑核奪此批

批史鶴鳴等呈為警佐楊敬與成績卓著請獎文 九月一日

呈悉查所陳楊警佐各項成績本為警察官應盡職責且官吏功過本公署自有糾察現在該警佐正因控案查辦所請暫勿庸議仰即知照此批

批毛永年等呈為議員兼任區董與法令抵觸請飭依法遵行文 九月二日

據呈已悉仰仍候令縣查辦具覆察奪此批

批王福田呈為子王晨在德留學請給律貼文 九月二日

兩呈均悉查該生因生活困難留學維艱自屬實情應暫准照十二年度辦法在留學西洋經費項下補助該生國幣二百元以事體恤而宏造就除飭財政廳照發外仰該民就近赴廳具領轉匯可也此批

批石崑等呈科長孫蔭溪濫押刑訊請查究文 九月二日

呈悉查核該員等列舉縣署科長孫蔭溪受理訴訟刑訊各案案由多係民事範圍應歸該縣司法公署受理審判該科長為行政職官何能過問所稱是否屬實仰候令行該縣知事查明呈復再行核奪仰即知照此批

批張慶椿呈為子善繼留法學費支絀請補助文九月二日

呈悉查該生張善繼留學維艱自屬實情應准由十三年度留學西洋預算項下補助國幣三百元以事體恤而宏造就除飭財政廳照發外仰該民就近赴縣具領轉匯可也此批

批薛寶珍于夢祥呈二件呈為投標認充龐各庄大牙行迄未發帖文九月三日

據呈各節是否屬實仰候令行財政廳查明核辦此批

批沈桂芳呈為請令永清根據廳判恢復村長校長職務文九月四日

呈悉查各縣之村長校長直接受縣公署之監督至委任或撤換縣知事自有全權該民所稱究竟是何情形本公署無憑懸揣仰即逕向縣署聲請可也此批

批王心田等呈為四區五區各堤決口請款修築文九月六日

呈悉業經據情令縣查核辦理矣此批

◎京兆各縣水災調查報告節畧◎

(一)大興縣 自本年春夏以來雨澤缺少天氣異常亢旱直至六月下旬稍見透雨農民正冀秋成詎於七月二日陰雨連綿即由八日以後連日大雨滂沱通宵達旦至十五日始止平地積水幾成澤國兼以河水漫溢宣洩不及田禾被淹房屋倒塌各情形計全境被害之區約有二百餘村之多損失之鉅可以想見矣

(二)固安縣 該縣霪雨連綿境內低窪之處先被雨水沖淹嗣因永定河南岸上游決口灌入大清牯牛兩河以致兩岸漫溢遂致附近兩河之區悉多被水共約五十餘村被災其附近東岸之數十村禾稼雖淹房

水 災 報 告

六

屋尙存十分之七八至臨西岸之區十二村不但禾稼被淹而房屋亦多被冲坍塌人民野棲露宿情形綦慘

(一)房山縣 該縣內自七月十二日至二十日霪雨連綿山洪暴發以至城東之大石河西南之巨馬河水勢大發沿河一帶均成澤國吉陽等四十餘村田禾淹沒秋收無望沿河地畝多被冲刷變為流砂走石不堪耕種間有房屋坍塌牲畜死亡者又西北山中陳家台等一帶村莊兼被狂風將果木樹株颯倒甚多該縣共計災區七十餘村冲去田地一百五六十頃

(二)昌平縣 該縣灰嶺口村長陳寶玉等報稱竊於舊歷六月初間至十五日連日大雨所有村中各房屋被水滲漏坍塌不堪不意于十五午前村中被山水冲去住戶十一家共傷九人其餘之人均受重傷無處棲身又無口糧終日哭號慘不忍聞又魯疇村趙文蘭等報稱以該村子霪雨連綿河水驟漲漫溢周村房屋坍塌糧食冲去禾根已腐秋收無望

(三)順義縣 自七月初五初六連日陰雨初九十日大雨如注直至十五六日尤大雨不止以致城東白河箭桿及城西小中温俗各河陡漲平地水深三四五六尺不等如第四區古城第五區孫各莊第七區燕王莊第十一區胡家營等數十村禾苗淹沒房屋坍塌不可勝數且本年自春至夏雨澤稀少境內高地多係晚禾目前高不盈尺經此霪雨連綿大半枯黃收成無望

(四)懷柔縣 自七月七日以還大雨連綿水勢驟漲又因各河均無堤埝以致波濤洶湧莫可防遏所有近河之蕭兩河杜兩河劉兩河小杜兩河霍各莊趙各莊王化莊等數十村田禾盡被冲刷房屋倒塌無算而

未近河之高各莊章里莊正重莊高米台張各寺等村亦因雨水過度莊稼大半淹沒廬舍全行坍塌穀
玉黍麥等久經水浸穗葉多半黃萎收成已大減色若不廣爲振撫則數萬生靈恐難苟延殘喘矣

(一)安次縣 境內各村莊自大雨以後就地漫溢之水高出平地二三四五尺不等交通多半斷絕最重者
城南五六各區因風雨勢猛拔倒樹木數千株坍塌房屋壹千餘間且自永定河水冲入大清河之後遂由
霸縣境內將中亭堤潰決直冲該縣南面五區褚河港各村莊房屋倒塌尤多糧食大半淹沒遭災村莊計
約一百九十餘村

(二)平谷縣 七月以來大雨綿綿山水暴發河流洶湧東南鄉一帶被冲刷地畝甚多沿河各村地畝房屋
亦均遭淹沒

(三)密雲縣 自七月七日至十八日接連雨多晴少潮白兩河四時暴漲護城石牆稍有冲毀處岌岌可危
且仍積水田地

勸募諸大善士捐給各災民舊衣服以禦寒冷文

京師內外城住戶各大善士均鑒斯民不祿連歲凶饑本年各屬災害爲數十年所未有洪水之來命在呼吸
或攀登樹杪或匍匐屋巔浩蕩瀾漫呼號無應冥心沉思食不下咽轉瞬秋冬天寒日短嗚號在野剜目驚心
若不妥爲籌畫廣儲寒襦爲之衣被則凡此溝瘠不死於水之驟來而將死於水之既退同胞淪溺寢饋難安
用特登報勸募

諸大善士將府中衣服無論男女大小各種舊衣凡可以洗濯縫紉儲棉而製災民寒衣者請檢出就近送交

各區警察派出所代收隨時掣給收條彙由本署製成分發各縣散放伏維
 諸公憂樂與共之心即蒼生性命相托之地雖屬懸鵠百結均如挾纊增溫不啻廣廈千間大庇祁寒嗟怨災
 禍餘生悉沾鴻澤於無既矣謹代被災子黎九頓以請敬頌
 善祺

京兆尹公署河防災振事務處啟

募集舊衣辦法

- (一) 本署收集此項舊衣專備附入冬賑分發被災各縣施放
- (二) 本署所收無論男女大小新舊各衣凡可製成棉衣者悉行收取
- (三) 各大善士施助此項舊衣請隨時交本段警區分駐所或派出所隨時掣取收條
- (四) 各分駐所或派出所代收舊衣每日彙交本區警署代存電知本署派人往取
- (五) 本署除印具收據交各分駐所各派出所隨時掣給施主外所有收入各件應俟將來彙齊一總登報鳴謝

＊京兆印花稅處公牘＊

訓令二十縣知事本處撥解京兆國道局經費一案由京兆各縣徵收印花稅款項
 下按月分半數攤解令仰遵照辦理文九月五日

案查本處撥解

京兆尹公署京兆國道局經費一案前經呈准


財政部由京兆各縣徵收印花稅款項下按月分半數攤解由本年一月起以六個月爲限業經遵辦在案現已限滿復由本處呈請

財政部核示辦法旋奉

指令內開據呈已悉各縣攤派國道局經費一案應准自本年七月分起再展期六個月除咨行京兆尹轉行遵照外仰即知照仍一面督飭各縣按照原定比額切實推行等因奉此除呈請京兆尹並分行外合亟令仰該知事遵照辦理切切此令

公

版



十